



SAKSFRAMLEGG

Saksnr:	Utval:	Dato
	Formannskap/plan- og økonomiutvalet	

Sakshandsamar:	Arkiv:	ArkivsakID
Knut Trefall	FE-140	22/1349

SAMFUNNSDELEN - UTLEGGING TIL HØYRING OG OFFENTLEG ETTERSYN

Vedlagte saksdokument:

Kommuneplanen sin samfunnsdel - Vaksdal kommune - Høringsutkast
Rapport - Medverknad Planprogram KPS
Kunnskapsgrunnlag KPS

Kommunedirektøren sitt framlegg til vedtak:

Forslag til kommuneplanen sin samfunnsdel 2023-2035 vert lagt ut på høyring og offentleg ettersyn, med heimel i plan- og bygningslova § 5-2 og § 11-14.

Saksopplysningar:

Samandrag

På bakgrunn av planstrategi for Vaksdal kommune 2020-2024 og planprogram for kommuneplanen sin samfunnsdel, vedtatt 21.02.2023 har kommunedirektøren utarbeidd forslag til kommuneplanen sin samfunnsdel 2023-2035. Kommuneplanen er utarbeidd med brei politisk involvering og medverknadsprosessar for befolkninga. Kommuneplanen sin samfunnsdel inneheld fem satsingsområde for samfunnsutviklinga framover. For kvart satsingsområde er det utarbeidd målsettingar og strategiar som skal følgjast opp i kommunen sitt planverk og i handlings- og økonomiplanen.

Vidare saksgang:

Etter behandling i Formannskapet blir planforslaget lagt ut til offentleg ettersyn og sendt på høyring til aktuelle myndigheiter og organisasjonar. Etter høyringsperioden vil merknadar bli vurdert, og planforslaget eventuelt revidert. Planforslaget vert så lagt fram for kommunestyret for endeleg fastsetting.

Bakgrunn for saka

Samfunnsdelen av kommuneplanen er kommunen sitt viktigaste styringsdokument og skal danna grunnlag for kommunen sine prioriteringar i handlings- og økonomiplanen. Samfunnsdelen inneheld politiske satsingsområde, mål og strategiar som skal følgjast opp i andre strategiar og planverk, i tillegg til i vårt daglege virke.

Gjeldande kommuneplan- samfunnsdel for Vaksdal kommune vart vedtatt i 2017. Gjeldande plan har mange styrker, og har på mange måtar fungert godt som eit politisk styringsverktøy. Samstundes har

det skjedd endringar både lokalt, i storsamfunnet og i overordna føringar og rammevilkår, noko som gjev behov for å oppdatere samfunnsplanen som eit verkøy for styring av utviklinga i Vaksdal.

Planprogrammet vart vedtatt 21.02.2023 og inneheldt bakgrunn og målsetting for planarbeidet og informasjon om organisering, medverknad og framdrift. I planprogrammet vart og dei viktigaste områda for samfunnsutvikling presentert. Dette er nytta som eit utgangspunkt for utarbeiding av samfunnsdelen.

Planforslaget er eit resultat av ein omfattande prosess med arbeidsverkstader i kommunestyret, medverknad frå råd og utval, innbyggjarar i ulike deler av kommunen, og barn og unge særskilt. Kommunedirektøren si leiargruppe har vore tett på prosessen.

Kommuneplanen sin samfunnsdel er kommunen sitt overordna strategiske styringsverktøy som seier noko om kva kommunen ønsker å prioritere. For å komma fram til satsingsområda, mål og strategiar har det blitt gjennomført politiske verkstader i kommunestyret, med tverrpolitiske diskusjonar. Diskusjonane og dei politiske føringane frå dei politiske verkstadane ligg til grunn for innhaldet i samfunnsplanen. Satsingsområda for kommuneplanen sin samfunnsdel for Vaksdal 2023-2035 er:

- Attraktivitet og trivsel
- Barn og unge
- Næringsliv og arbeidsplassar
- Klima- og miljøvennleg utvikling
- Kommunikasjon og openheit

Kvart av dei fem satsingsområda har hovudmålsetting, delmål («slik vil me ha det») og strategiar («slik gjer me det»). Dei fire første satsingane handlar om korleis kommunen skal satsa og utvikla seg. Det femte satsingsområde, kommunikasjon og openheit, handlar om korleis kommunen kan jobba saman med innbyggjarane gjennom samskaping og mobilisering av ressursar. Dette er avgjerande for å kunne skapa ein god kommune i fellesskap med innbyggjarane.

Arealstrategiar er overordna prinsipp for arealbruk. Det kan utarbeidast ein langsiktig arealstrategi som ein del av kommuneplanen sin samfunnsdel, arealstrategiar kan òg utarbeidast som ein del av prosessen til kommuneplanen sin arealdel. Gjennom arbeidet med kommuneplanen sin samfunnsdel for Vaksdal har arealstrategiar blitt vurdert, og kommunen har konkludert med at slike strategiar vert del av prosessen i ny arealdel av kommuneplanen.

Formelt grunnlag

Plan- og bygningslova § 5-2 og § 11-14.

KOM 104/2020 Planstrategi 2020 - 2023

Vurdering og konsekvensar

Utkast til kommuneplanen sin samfunnsdel for Vaksdal 2023-2035 er klar til førstegangsbehandling. Samfunnsdelen inneheld satsingsområde, mål og strategiar, som er basert på kunnskapsgrunnlag, medverknad, dialog og politiske diskusjonar i kommunestyret. Kommuneplanen sin samfunnsdel er spissa, og syner satsingar og prioriteringar i perioden.

Kommunedirektøren tilrår at planforslaget vert lagt ut på høyring og offentleg ettersyn, slik at regionale myndigheiter, lag, organisasjonar, innbyggjar og andre interesserte får anledning til å komme med merknad til planutkastet.